

南

河

志

南河志卷之十四

南河郎中朱國盛編輯

員外郎彭期生
郎中顧民鼎
全較

郎中徐 標續纂

文移

附

朝廷體尊通之以章奏案條分隔定之以文移所以達上下
之志意審規畫之當否者也河務考年簿書盈石五百里
內藉以昭宣茲特錄河工重務數條付剞劂不忍以信牒
常套而盡委之胥人耳

議築露筋石堤詳文

為議築險要石堤保漕衛民事竊惟本司承乏河干謬叨
任使凡一切興除事宜苟有裨于河防者靡不竭蹶勉圖
以副 德意如淮屬山清裡外塞決濬淺之工高堰武墩
幫培修砌之工通濟閘金門上下拆砌之工楊屬高寶西
中各堤修建之工與各屬上年歲修堤岸閘座蓬廠之工
皆賴

本部院主之在上次第竣後以報惟是高郵州城南三十
里江都搭界地名露筋又名小湖口一帶河道約長一百

六十丈通湖極險原無束水西堤一望汪洋實為巨澤每
遇西風微作浪輒掀天往來糧馬等船動遭震蕩向來溺
傷民命不知其幾矣計必建築石堤庶可捍禦本司履任
之初亟欲興築但以時訕舉盈未敢輕議公帑切恐將來
日甚一日湖水漫延東堤汕薄一有不測干係匪輕近據
高郵州申詳欵詐行克犯人謝應魁徐良等罰追料物計
銀三百兩率同河官即日下土可以培本堤之根又瓜間
代報犯人晏聯芳等淮安侵占夫銀犯人樊繼芳等各詳
允贖大約計銀三千餘兩若以之採買石木等料可以

竟本堤之役第奸計延挨一時未肯全完惟陸續追收陸續儲料似亦通便此外存餘銀兩仍聽作正支銷又有本司追貯山陽庫內各夫歇曠及開築晉爵等贍并遺漏夫銀皆係節省稽核所存可以通融動支以為添募人夫論工犒賞及開工告成等項之用庶公帑不費興作有需其于漕運民生均有利賴矣至于督工則有高江管河官給銀稽料程功則有高江掌印官往來催督與臨工查核則有司道與該府管河官上下協衷竣工似易但前項允贓罪係

兩部院項下之銀皆有司所當經理之事非本司所得而專擅者緣前蒙詳批賸銀聽河道等用又值庫帑匱乏之秋重以仰體

本部院保漕恤民至意故敢冒昧以請合無請乞

本部院特賜裁酌詳示下司會同該道轉行管河府官督同該州縣印河官躬親勘估造冊繪圖轉報定奪伏乞照詳施行

撫院批修築險要堤工誠保漕衛民求利如議行仍詳河院行繳

中堤估計詳文

為議築險要中堤以固運道以安民生事據揚州府管河
通判于範呈稱蒙本司案驗前事照得高郵州北河中堤
計長四十餘里卑薄危險水發議塞兩閘金門雖防衛本
堤而外湖舟行險阻常致覆溺傷人誠不忍見聞者關係
國計民生匪細仰職行州管河官查勘某段低窪極險應
首先包石若干丈某段稍險應次第砌石共該工價若干作
速回報以憑議舉等因蒙此遵行該州查估去後今據申
稱會同管河官勘得中堤量長三千一百零九丈內分極

險亟宜包砌石工一十二段計長六百四十四丈筭該工料銀五千二百七十五兩六錢二分一釐又有稍險應次砌石先幫高厚工長二千四百六十五丈已經造冊候詳又奉河廳信牌該蒙本司牌蒙

欽差總理河道陳 憲牌為申飭歲修工程以無悞河工事又蒙

欽差總督漕撫軍門部院李 憲牌為修飭河防事皆屬先事預防合請轉達俯於淮揚府庫積有河道官銀動支起此時水未發亟為轉詳修理等因造冊到廳呈詳到司看

得中隄卑薄滲漏逼於秋水輒閉金門二閘築壩之費大擾民間而一切船由外湖屢遭覆溺往來士夫有身驚漂溺者本地士民有口訴慘傷者本司痛思極溺亦屢謀及此而無柰時之不易也物力之不充也今當就估數酌為三年之計先一面糾工幫土擇險中之險者量為包石其可支月日者姑為椿板歲遞加石焉一勞而永逸力徐而易舉似為事省功倍唯見年起夫作何調度或照田照里從其便可也椿板在原估之外此欲俟後二年而為此不得已之計耳仰州從長細議速報以便轉詳批行去後續

據該州四稱隨經督同本州管河判官徐賢詣堤獲估續
隸本官牒報極險堤工六百四十四丈今於內擇其至險
勢不可緩者計五段量長二百四十丈估該工料銀一千
九百六十五兩八錢一分其餘四百零四丈留俟下年次
第包石一面鳩集里夫村船運土幫培高厚以禦伏水等
因覆詳前來又該本司勘得所估過浮難以轉詳議將本
堤磚石相兼甃砌其中工料可減查得先年小湖口估用
河磚每塊長一尺四寸濶六寸厚四寸價銀八釐今本司
親置式樣每塊長一尺六寸濶五寸三分厚三寸與舊磚

折筭價銀六釐五絲七忽一微五纖堤長二百四十丈原
估砌高八層今一槩磚石相兼上下用石中間河磚費省
工堅可恃經久原冊發回刪減改造其密戶燒磚并江南
採石俱不可緩查該州歲報冊開見有庫貯河道銀兩於
內先動銀三百兩分給密戶山戶燒磚採石之用似屬通
便覆行去後隨據該州申稱遵照發去磚式減估計堤長
二百四十丈議以磚石相堅包砌足垂經久於內減去銀
二百九十三兩七錢九分九釐四毫八絲外實該工料銀
一千六百七十二兩一分五毫二絲俱係實用之數再難

刪減查照改正造冊外一面動支庫貯河道銀三百兩分
給山戶木商密戶陳文聊月等領買木石造坯燒磚聽候
應用其餘銀兩合候詳示至日另行找領等因造冊申詳
到司據此今該司道勘得該州濱臨湖陰素稱澤國其城
北中堤四十餘里俱係漕運經行要路土堤卑矮每遇水
發漫漫閉關保堤船由外湖往來風浪叵測每每覆舟溺
人是漕河所宜亟理者也至于築壩費用夫船借動料物
尤多擾害即本司履任之始首議本堤包石以免決裂衝
傷之患但因時訕舉盈遽難興工今據所估險工六百四

十餘丈酌量緩急議以三年帶修誠為妥便先擇最險二百四十丈亟宜甃砌及查高寶諸堤凡砌石工一丈大約用銀十兩有奇淮屬王公堤砌石一丈用至二十餘兩今此堤以磚石兼用每丈僅及七兩之數似為省費委屬可行至于估定料銀一千六百七十二兩一分五毫二絲據稱並無虛冒難以刪減除將該州庫貯河道銀內動支三百兩先給辦料外尚該一千三百七十二兩零應于本府庫貯由閘銀內動支其高寶江儀四州縣淺閘人夫清工贖銀七百九十九兩三錢一分九釐四毫聽另詳議

庫或抵前項中堤之用或聽別項支銷總候批示遵行外
今據前因相應呈請合無請乞

本部院軫念漕堤險害係關

國計民生俯賜詳示司道轉行揚州府并管河于通判轉行
高郵州縣領掛號支領本府庫貯由閘船稅銀一千三百
七十二兩一分五毫二絲聽掌印官分投採買木石燒造
河磚擇日興工儻做勒限一月報完所修工程務要如式
堅固足恃經久管河府官往來催督仍聽司道不時臨工
查驗如有苟且虛應工程不堅管工委官定行拿究重治

通候工完造冊覈實銷箕惟復別有定奪伏乞

照詳施行

總漕李 批由閘銀准動支修造候 河院詳行繳

總河陳 批據詳修砌高郵中堤以固河防可免開閘行
舟涉險覆溺之患委宜急舉第時誦費鉅一時難措今議
次第覈勘誠得緩急之宜又酌以磚石兼用非但費省抑
且工堅該司道調停苦心裨益運道民生非小先估險工
銀一千六百有奇除已動該州河銀三百兩外餘銀于清
出曠工銀內動支不足者找支由開船稅銀速行該州採

石辦料府廳往來催督限一月工完覈實冊報毋容虛冒
繳

議清行夫并挑新舊二河詳文

為敬循職掌再申河道喫緊事宜以嚴修濬以裨運務事
竊惟本司猥以淺昧承乏河干凡於修守啟閉之宜冒濫
侵漁之禁與河官之不許別委河銀之不許那支業已仰
遵成議轉行申飭并於去歲五月間具呈條議二十八款
蒙批該道詳覆外所據淮揚河道自清口至瓜儀延袤幾
五百里誠為漕運咽喉其中屢決屢淤變遷難治者惟山

清為最始因先年黃流內灌走沙墊淤迄今二十餘年船
運漸遲未能作壩大挑旱潦時常為患如去歲夏秋水發
工程停止冬春水涸復行挑濬本司慮恐鳩工之難成工
之緩又調集高寶人夫并本處淺募等夫協同撈浚河已
深通夫船撤放未經旬日又復淤淺皆由天亢不雨河水
未發風色不定長落不常殆未可恃為久計也又經嚴行
各官時其調度尅期完報去後目下重運已臨回空未盡
再復淺阻干係匪輕先經行據府縣各官議將楊家廟新
河一面丈量估計挑浚一面將舊河大加撈治期無悞遲

俟新河既通再行挑濬但以人心易怠經費不貲尚須商
確或用錢糧或議查理行夫銀兩逐段開報濬通事在崇
眉時難再緩所當請明嚴行各官加意料理以備緩急者
也河工用力全賴人夫除各屬堤浚開堰等夫歲給工食
出自議定條鞭由關等項銀內按季掛領支給已有定規
各夫專供築堤浚濬栽柳採草事有專責無容別議外惟
是山陽縣設有行夫九百名歲額工食銀八千餘兩出自
縣淮牙行徵銀募夫原宜隨時催募者也乃有積年奸棍
通同工房積蠹謀克老人火頭每五十名為一單設老人

一名為單頭召集四方流棍充數遂常川每名日給工食
二分七釐每逢給散盡是火老總領散夫食不充腹通無
實惠本司往來堤上查看未見募夫築有堤工及調撥浚
淺往往假做土堆旋點旋散盡屬虛應以致河淺糧運為
梗近議從春季革去計工給銀如板關一帶撈濬據河廳
呈稱計土論方每日該銀不過一分上下則平時虛冒不
問可知小夫既無實沾工程又無實効名存募夫六百實
十無一二並無花名年貌可考不過積棍借以瓜分耳夫
以民間千萬金錢徵之何其難而奸棍乾沒費之何其易

況夫既曰募自與徭役不同銀可額支又與徭夫無異而
權其聚散律以工程大相懸絕本司目擊此弊病國病河
思逐工覈實則曰吾常川在工者也及取花名年貌則曰
吾已墊銀短催者也河官總一清理便欲蜚語抗凌法紀
蕩然將何抵極除春季工食銀一千五百八十一兩有零
已經會驗發縣財庫司道議定候量給今正計浚新河已
經會行該府河官督同該縣將前項募夫從長計議或行
縣從舊老人精選壯丁二三百名常川領銀供役或行縣
審用殷實夫頭隨時催募計工給銀以課實用再查九百

名額内存餘夫銀貯於何處當此

國家多事帑藏空虛前項餘銀或作每年歲工之用或作河上不時之需務須司道逐季會驗明白封識不許移借裨河有實工夫有實用上不病國下不病夫其積奸盤踞蠹河剥衆者嚴懲一二以警其餘目下濬河正急用夫正殷所當請明嚴行各官作速議妥著為定例以裨實用者也治河必須專官實心任事方可責成向來因循惰悞幾不可理屢經司道極力清查稍稍就緒維時新任張同知未曾到任惟帶河通判連躍早夜勤渠克襄厥事即今空重

運船往來如織繡堤挑淺工作繁興一切程督稽催誠不可頃刻乏人替近聞連通判奉委徐州監兌遺下河務又將改委竊恐繼事者未必稔知河性而日遲一日未免顧彼失此有悞運事所當請明轉行該府或選委府佐或仍留本官着實經理以無悞河漕之重者也至於近河一帶萬頃汪洋皆負郭膏腴之田河身既深田水可瀉滄則民有賠糧之苦疏則民有爭奪之事或看庄頭預報出夫助工候田出領種或一槩工成量為升科助工亦就近利便所當併議以資工役者也以上數事或為糧運急圖或為

河防修守或為公私兩便皆司道職掌所宜言者然而語多迂踈心實懇切故不知忌諱輒敢冒昧以請合無請乞本部院特賜裁酌詳示司道轉行府縣各官速為議覆各另轉詳請奪庶修濬以勤漕河無悞而於重責成祛積弊均有賴矣惟復別賜定奪伏乞

照詳施行

總漕呂 批據議浚河濟運計夫程工與專官督理均于河漕有裨悉如議行此繳

總河房 批據前三款疏濬河道嚴核夫銀責成河官俱

中肯綮足見該司道實心任事勞怨不辭矣速行府縣議妥覆確各另詳報

挑新正二河詳文

為緊急河工事查得山清正河向以黃沙內灌淤澱旁決之患無歲無之勢必大挑庶免後患然欲挑正河必先挑新河新河既通再挑正河次第舉行誠不容已惟是帑藏空虛難以議動所有本年春季募夫工食銀一千五百八十一兩九錢三分既勘無實工即應全扣因念各夫積習之餘待食日久屢次控告河廳代為申請該司道公同議

給四百兩以恤其貧其餘一千一百八十一兩九錢三分
即抵前項工用不足銀數于夏季折夫銀內找支不必議
及公帑似為妥便但所估土方每方該銀八分者今估一
錢一分于數既浮而所議深濶尚需加挑以防淺隘除已
先動前銀六百兩司道面給老人金成等募夫行委連通
判督率山陽縣主簿季子寧吳茂才分工挑濬俟廳縣再
議展拓加深丈尺工料的數至日司道核實轉詳定奪前
項緣由已經會呈

本部院未蒙批示五月二十等日據管工主簿季子寧等

稟稱新河工多夫少難期速効乞調徃夫幫做等情據此
看得各屬歲工興舉隄防宜慎徃役人夫各有專責若復
調撥不無妨悞查得先年淮安裏外河俱有大役即借營
兵駢力用工尅期竣事此無他謂防虜防河均為

王事而一切食餉之人均為王臣也今歲之河患實倍于往
昔在河之夫役皆徃于平時雖催檄如雨而推調如故將
來悞運害可勝言再照司道上年清出行夫除河工正額
九百名外其餘佐兵餉者尚多以食河銀之兵而効河工
之力較往年徃行調用容有差矣合無酌議應否會詳議

撥營兵若干專委運通判分派新河并各段淺處協力用
工以期速効完日仍歸本營應役如或勞逸少異即于正
支月糧之外每日量議加增以示鼓勵其在河有實効者
即照營伍功蹟陞補以酬勞勩總之正河為漕運直捷要
道新河為一時預備間道前以夫旱水涸議挑新河備運
要亦治標之急著兼為治本之久着也若正河不議大挑
淤淺徒事撈漕竊恐日甚一日年復一年積沙愈堅為力
非易將併淮南俱成淺阻其患庸可勝言哉但此役工費
既繁獨任怨勞匪易須衆謀僉同協應方無掣肘若非

台臺威命主持則任事者恐反採好事之譏而優游者坐
博得安靜之名矣是非河道之幸也擬合呈報

淮安挑新舊二河并築護堤詳文

為河道事抄蒙

欽差總理河道軍門部院房 憲牌前事案據淮海道詳開
南河分司條議一款堤工兼用磚石該本道看得河非堤
不成而堤非石不久楊屬石堤尚多淮屬石堤甚少即以
郡城之際上下僅六七里不過一縷土堤卒酉堤決城陷
職此之由淮安重地如此危險而久不議及殊可怪也今

若上自西湖嘴下至楊家廟內起建石堤磚石兼用保障
三城數千萬生命是萬世之利也酌勢度時委屬喫緊伏
候台裁等因據此看得淮安地方當南北要區黃淮會津
每歲伏秋水漲最係危險如天啟元年衝決王公祠等口
淮城陷溺民幾為魚今若以近城土堤而以磚石兼用甃
砌一勞永逸不惟郡城免衝陷之虞抑且淮民無昏墊之
苦合行速勘仰司即便轉行淮安府掌印管河官自西湖
嘴起至楊家廟一帶逐一相度其段堅固離城尚遠仍用土堤分別
石工堤岸磚石兼用其段堅固離城尚遠仍用土堤分別

緩急舉行要見夫役作何調派錢糧作何設處料物應委何官買辦工程應委何官董理務要嚴禁虛冒料必速辦工須實在計期竣役保障郡城文到作速勘明具由詳院施行等因蒙此本司遵依會同淮海道牌行淮安府掌印管河官即自西湖嘴起至楊家廟一帶逐一相度勘明造冊呈詳司道以憑會核轉詳去後續于本年九月初三日該淮海道抄蒙

欽差總督漕運軍門呂 批狀據各地方鄉民金梓毛恩等稟為祈天拯水患以固城池以利 國計民生事又據淮

安府軍民郝桂芳等連名呈為保郡安民事又據山陽縣儒學生員陳維歲等鄉民周文升等呈為急救水災酌議未利以保民生以完糧稅事各稱淮城地勢居下水患靡常乞重建堤濬河保固城社護衛田廬民漕兩便等情據此會同轉行淮安府并管河張同知轉行山陽縣親勘造冊呈來聽候轉詳定奪去後續據山陽縣申送挑濬新舊二河并建築淮安近城石堤工料文冊內開先挑新河行運復估原挑新河未完工程并續奉文加挑深廣土方共該夫工土方銀一千三百零四兩六錢議挑運河濬計土

方築壩夫工等項共該銀一萬六千九百三十二兩七錢
近城堤工共長二千二百六十一丈估用工料銀四萬五
千九百六十四兩二錢九分六釐三項通共估銀六萬四
千二百零一兩五錢九分六釐緣由申詳到司該本司看
得公帑匱乏各工所估太浮駁行張同知痛加刪減分別
各另造冊其城堤照高寶石工事例估動錢糧應否先行
燒磚備辦木石諸料至于濟河先完新河之工次挑正河
俱候水勢消落興舉仰廳作速議妥呈詳轉請

總院施行等因去後續據本官呈稱遵依督同山陽縣管

河主簿李子寧親詣裏河一帶查勘除新河土方原係乾
工今蒙本司明示每方估給土方銀八分今共估銀一千
二百零四兩六錢但正河土方因河水盈溢尚未消落恐
內有淤灘寬窄河身高低不等增虧相補折筭難估挑深
五尺口濶十丈底濶六丈河底中泓淤泥陷較比乾工
不同每土一方估給工銀一錢并築攔河大壩二道連土
方共估銀一萬六千九百三十二兩七錢無庸再減又查
勘近城石堤原據該縣估長二千二百六十一丈共估工
料銀四萬五千九百六十四兩二錢九分六釐該職按冊

運陵細加丈勘內查高阜堤岸六百五十一丈免建石工
并應減繕石等項共減銀二萬零六百一十二兩二分六
釐其應砌石工長一千六百一十丈實估工料銀共二萬
五千三百五十二兩二錢七分以上三項原估通共銀六
萬四千二百零一兩五錢九分六釐今石工內減去銀二
萬零六百一十二兩零二分六釐三項通共實估銀四萬
三千五百八十九兩五錢七分外為照挑河開淺建砌近
城石堤實

部院司道為國為民久長之計本職仰遵 憲檄履減明

白俱係實用之數備造文冊相應轉呈惟是預估終屬於懸度致用乃使於實藉材料齊興工先將一丈深濶當面看其佈置或有以多為貴或有以東為益者總未可知中有未盡事宜不妨臨期通融酌議再行請詳外合無請乞本司俯賜裁奪批示下職處便遵行等因據此該本司看得所估各工銀數仍為浩繁先將城堤估冊分款標駁詳批據議近城堤工內有磚石層數與燒磚工匠等價尚屬浮泛該廳所謂預估終屬懸度致用乃便實藉俟料齊興工先以一丈為率就中衷益極中肯綮仰照款酌量減估

從實詳奪其濟河工程估費頗奢更宜核實仍候另文發
冊刪定轉詳等因批行去後續據淮安府經歷司呈詳到
司據此看得詳內議處錢糧分委僚屬與鳩工儲料并綜
理稽察賞戒勤惰等項皆井然有條足仍該府留心河務
嘉惠民生乞協部院憂

國憂民至意務在及時興舉俾本司得藉手以報斯則萬世
金湯之利微獨安瀾利濟已也除近城堤工俟該廳臧估
造冊至日覆核會詳外所擬挑濬新舊運河一節誠為喫
緊要務但工程浩大關係匪輕必須詳議妥確方可轉呈

案查本年六月內該本司看得淮揚河道自瓜儀抵清口
延袤幾五百里皆為漕運咽喉其中屢決屢淤變遷難治
者惟山陽為最先年糧運過盡即于清口預築攔河大壩
以禦橫流迄今三十年来清口之壩不築內河之底日高
以故遇水則決稍旱則淤如節年直隸賑謝家墩及楊家
廟等處之衝決幾于漫城福興閘上下暨板閘移風閘等
處之淤淺幾為平陸雖以司道躬親調度倖免債事而帑
金民力所費亦不貲矣未幾而深者復淺淺者益涸先年
靳于人力今日諉之天時均非所以為善後計也本司目

擊時事憂心如焚節經嚴檄河廳及該縣印官俾其上下
協衷以圖一勞永逸之計而廳縣亦皆有見于此故有先
開新河後濬正河之議先後申呈到司俱經批行去後續
該司道備將前由會呈

新二部院續蒙

總河部院房 詳批據詳三款疏濬河道嚴核夫銀責成
河官俱中肯綮足見該司道實心任事勞怨不辭矣速行
府縣議妥覆確各另詳報蒙此又蒙

漕撫部院呂 詳批據議濬河濟運計夫程工與專官督

理均于河漕有裨悉如議行此繳蒙此行據該廳縣造送
估濬新河工價銀數文冊前來已經司道面給土方官銀
行委河廳開濬新河以備糧運如正河之水不淺新河之
壩不開萬一告急以此應援要亦酌時措之宜從廳縣之
請也譬之病然病不除根有觸即舉將來日甚一日年後
一年黃沙愈積深谷為陵

國家數百萬之軍精淮城數十萬之命脉士風民業與各項
之稅餉徵輸一旦閉塞不通其患庸可勝言哉故欲為一
勞永逸計莫若舍標而治本治本謂何治正河是也欲治

正河預開新河是也本司職專治河期于河治斷不敢因循其事傳舍其官以艱貽之後人惟是工程繁鉅人心未齊尚須諏諮以協輿論隨經出示曉諭槩淮鄉耆士民人等凡有念切地方者不妨據實陳說要見正河不早濬治將來淤墊害事作何區畫以為良圖新河暫議開挑秋冬大濬正河永杜沙淤是否便益正河挑時不過匝月可以竣役不挑而遇枯竭既于漕運稅餉有悞又于文風地脉相妨行止兩端孰為輕重凡我士民皆可籌度毋拘成案毋徇偏見隨事制宜陸續商訂以為定論則食土之毛者

皆能勤王之事本司且喜江淮間有此同志亦寧以臆
見廢名言哉等因出示及將挑河築堤等款先經條列呈
詳兩部院批行淮揚二道議覆轉行間節蒙憲檄前因
蒙此該司道行據該府廳縣先後申呈前來據此為照挑
河以濟漕運建堤以保民生除邇來不虞之患作千年魚
利之圖此自本部院司道護衛民漕素志屢屢見之公移
當無俟鄉民有呈而後議批駁至再而後詳也第時詘未
易舉盈慎終不如謹始宜于今當稽于昔清其源可遏其
流而一切糾夫計土與夫防沙禦水之方誠不可不講也

合再查議又經會行淮安府并張同知查照節行事理大
到作速議妥造冊通詳司道立等會核轉詳施行去後續
准淮海道手本抄蒙

漕撫呂批據淮安府軍民鄒桂芳畢夢龍等亦稟為保
郡安民事蒙批仰淮海道速查報又准本道手本內云挑
濬正河及建砌石堤工程浩繁非群力廣助不能必其工
之疾速而調撥營兵之舉自是宜然本道已面懇

漕撫部院乞行相應移會煩為併詳等因到司續據張同
知呈將新舊二河應挑各段口底寬濶并挑河深淺丈尺

估計土方應用夫兵并城堤採運木石分燒磚塊實估銀
數併及減估近城堤工實該工料銀數緣由文冊到司又
據淮安府經歷司呈稱行准本府管河張同知關送覆估
挑濬山陽縣新舊二河并近城磚石堤工各土方料價數
目文冊到府內開應用錢糧合候本府議處轉呈等因准
此查得本府漕阜二庫見在河道銀二萬五十四兩八分
二釐九絲已經開報應聽司道裁酌動用外所有前項濬
築河堤緣由呈乞轉達等因據此該司道會看得淮安河
道當黃淮衝戟之餘值水旱頻災之會河身挑濬既失三

年兩度之常漕運過淮又遲秋盡冬初之候累年運遲又在伏秋水漲之後清口大壩已不能築流沙內灌烏得不淤即每年估用歲修率皆冒破愆期故淺阻旁決之患無歲無之而魚民梗運之虞亦無日不釐

上念也荷蒙 台臺軫茲要害揀及芻蕘特檄查議以為民漕千萬世之計司道仰體 德意親督府縣印河各官躬詣估勘見河心淤高河堤卑薄追及往患更切近憂則挑河築堤之役誠有不容已者既經該府廳詳報前來又經司道屢次駁減除新河工程自本年四月開工給過土方

銀六百兩外今估未完土方及加挑深廣共銀一千三百零四兩六錢近城堤工料價等項共估銀一萬四千一十三兩七錢五釐五毫俱係屢減實需應用之數無庸再減外其挑濬正河原估四千二百丈係在水面丈量恐其中高下不一難以懸度且估費不貲更煩區處今議止挑二千八百丈以省繁費其土方工銀原估一錢一方者應照新河事例亦以八分算給計該土方工食并築壩等價共銀九千九十二兩七錢以上三項共實估銀二萬四千四百一十一兩五釐五毫查淮安府庫貯河銀止二萬五千

四兩零尚有歸仁等堤及各屬歲工需用于此似難全動
及查徐屬雙溝并高郵康濟河等工原有各郡邑協濟之
例今權議三停措辦准庫止動一分現徵行夫銀內湊用
一分或行別處并不得已而于揚州府庫貯河道由關銀
內協濟一分共足前數及時興舉庶為妥便然此該司道
再四核減之數實為節約工興之後倘有增虧稍異不妨
彼此通融總期于實工實用以無負台臺之委任而已
若夫先做樣工之料價與不時館工之小犒則有本司清
出人犯晉爵開榮等罪贖夫銀可以充用無煩別處所擬

分工買料設廠收支稽核銷獎等項該府雖已詳議司道
雖已款開然而未盡事宜可續為商確者尚多也仍候館
期酌議請詳至于揚庫應否動支營兵應否調撥料物應
否派辦俱請 台臺裁示奉行非司道所敢必也他如許
家石閘并通濟月河小閘河西一帶土堤及外河高堰等
處應修工程清口以外防沙禦水要務容司道督催該府
廳詳報至日陸續轉請定奪所有估定挑濬新舊二河并
近城堤工土方料價銀兩數目覆核明白備造文冊相應
呈請合候

本部院詳示司道轉行府縣并山清管河等官照欵遵行
其議動錢糧仍照往例行令該縣具領赴司道掛號支領
下縣聽印官親自收支及時燒磚辦料次第興工完日會
核造冊銷筭惟復別賜定奪司道未敢擅便擬合呈請為
此今將前項緣由開具書冊文冊同原蒙憲牌理合具呈
伏乞

照詳施行

計開

一議錢糧查河防一覽每遇大工興作或儘用現銀或

議留改折預備物料以資興舉增裕物價以均苦樂今該府庫貯河銀雖有二萬五十四兩八分二釐九絲尚有歸仁等堤并各屬歲修河工待用勢不得不循先年協濟舊例議及別庫并足以現徵行夫之銀庶幾有濟其工料除灰石土方工食賞犒原有定規外惟椿木有河工召商二價盈縮稍異恐本工需木緊急承買員役藉口耽延故從府縣印河各官之請折中估價以期如式速交其河磚長一尺六寸濶五寸三分厚三寸每塊價銀六釐五絲七忽一微五纖係準高寶舊河磚尺寸

折筭定價原無虧減今因槩准碑密不多取土稍遠府
縣初議每塊一分二釐則倍徙矣今亦折中定以九釐
一塊俾其樂于趨事計日交工若水有短細磚有黃碎
違限悞工買料督催與收料等官各有責任自難徇情
容縱自取不便一切價銀湏司道府縣印河各官公同
散給痛革和尅等弊庶價有實領料有實辦如有故違
需索者盡法定處至于工完銷筭則在該府掌印與理
刑各官悉心嚴核據實呈報加以司道覆核斯無負
部院委任耳

一議支放查河防一覽凡鳩工聚材出納銷筭務嚴稽核以防冒破今本工估費委屬不貲若收貯錢糧給散料價府議專委山陽縣印官掌之司道又議公同驗給可釐剋落之弊矣但料物交收往弊最大不私出收管則通同盜賣以致料無實用工不堅固今此大工河糧二廳與該縣印官務要躬親查驗出納惟明收放一切料物先設請司道印簿隨時登記以備吊查工完之日聽司道親勘將合式堤工內拆一二丈掘起地樁逐一量筭以為各工用料之準作奸侵盜者盡法究追亦稽料

之一端也

一議分督查河防一覽凡河工浩繁道里遙遠若非多官分理不免顧此失彼分工之後即遇陞遷不許離任今該府堤工估砌一千六百餘丈可謂浩繁矣新舊二河延長六七十里可謂遙遠矣若專責一河廳不但顧此失彼竊恐無以底績所當比照往例多委府佐或分委隣近州縣勤能官員盡地分管以裒大役者也

一議責成查河防一覽州縣正官職專親民故民易驅而事易集今此大工該府文內業屬之該縣印官矣一切

稽核夫工催督料物自其職掌工興之日所當遵照成
議躬親料理以一事權者也三城保障百世尸祝于是
馬在其餘各官上下相成左右手相為總體兩部院
嘉惠漕運民生之心為地方垂萬年之利若有衲鑿齟
齬敗乃事者請以憲法治之毋容少貸庶人心始肅
而大工可集矣

一議激勸查河防一覽凡在工佐領等官查有効勞實跡
者分別等第題

請超擢中間如有劣陞王官等項亦准改擢或從另議優處

其餘或重加獎勵或題給冠帶俾人心爭奮不至疑畏今此大工相應一體遵照舉行以示激勵其或怠厥職悞厥事者該府稽察既嚴司道經臨亦通斷不至徇情面滋隳墮也

一議優恤查河防一覽凡在河人夫辛苦萬狀除工食外准免丁石一年今此大役用夫最多立法稽查極其嚴督不有優恤何以鼓舞合無將一應夫匠除領土方工食者風雨量議多寡犒賞外其餘下椿挖槽等項調用徭役等夫每日加給銀一分或米一升即于本工土方

節省或贖工銀內通融支給類冊開銷如是而有不予
來者未之有也

一議息浮言查河防一覽治河固難知河不易勞民動衆
之事怨咨易興其中以是為非變黑為白者未必盡無
今此大工興舉司道祇奉 憲文督同勘估矢公矢慎
以期民漕兩便為千百年来利計而一時在事各官皆
踴躍協贊以循職掌諒無矛盾顧忌之心但清出夫銀
奪自虎狼之口而核減料物頓除貓鼠之奸向之漁獵
河工者既不得肆其貪饕之志近之弁髦河務者又疇

能禁其雌黃之言政所謂當局任事者甚難而旁觀論
事者甚易亦何怪乎河日病而治河之權日輕也合無
請

賜憲檄大加申飭以冀成功庶幾狂瞽潛消聽聞不雜而
共事于地方者皆無掣肘之虞矣

以上數款皆司道就事論事一時荒唐之語其中闕
畧尚多忌諱未避統乞

台臺裁酌施行

總河房 批據詳挑浚新舊二河并近城堤工土方料價

銀兩數目既經覆核明白准作速興工其動支揚庫調撥
營兵派辦物料原有通融之例不妨另詳至於條議七款
有裨工役悉如議行仍候

漕撫部院詳行繳

總漕呂 批據詳築堤濬河關運道通塞淮城安危亟應
修舉然必新河役竣而後堤工可興必新河深濶能通重
運而後堤工不至廢於半途是在司道嚴加督責其錢糧
支放分督責成激勸優恤并調撥營兵等項悉加議行
總河部院詳行繳

報建通濟月閘驗文

為河道事抄蒙

欽差漕撫部院呂

憲牌前事備由仰司即查月河建閘合

用工料錢糧何日興工報完速議詳報蒙此先該本司看得通濟閘為漕河第一門戶每年至夏築壩以拒黃水月壩向不易開祇因今歲重運愆期暫開濟急原非得已未幾而裡河數決殊費經營即今運已過完水已消落併力築壩萬難遲緩已經屢行山清張同知嚴督官夫下埽堵塞業報完六丈矣除勒限完工另報外為照月河既為緩

急之備則先事當為經久之謨若僅以泥土築塞苟安目前一遇開放流害內地恐終非久計也今奉明示相應于月壩口內添建石閘一座以備日後不時之需而壩身頗長亦宜併砌石堤接聯舊閘方免衝突之患先于本年九月初七日牌行山清河務張同知酌議去後并運周王二閘廢石湊用興工理合具呈又經催令本官作速覈砌工已將竣合候會核另文呈報今蒙前因合先回報為此今備前由理合具呈伏乞

照驗施行

編審長夫詳文

為審編長夫事照得淮屬牙役長夫專供河道之役先年
題 准遵行已久祇因奸役弊隱歷年串同私占以致夫
額不足河道失修本司自客秋到任以來徧歷河道凡物
料侵冒榛枝稀疎蓬廠不飭淺具無存長堤崩坍決口甚
多不勝浩嘆若清口為糧運咽喉以黃沙淤淀去秋水溢
幾至灌城今春水涸輒為平陸問其何以不濬不撈皆由
無夫無餉查河防一覽

前任總院潘 疏以牙夫一千八百名合為九百名專聽

河工應役各衙門別工不得私役一名違者叅究奉

旨欽行已久嗣後生齒漸繁牙行遞增者不啻數十倍于前而法久弊生每年該縣編審富牙營爲占免窮牙派在河工自九百遞減八百七自至天啟二年之編夫更少至五百三十餘名行據山陽縣申稱募夫缺額已久夫銀屢徵不前等因又據山清管河廳呈稱縣編舊額既缺又申免死者大總又免費貢生夫名少而又少募夫春盡入夏並無分文食用等因到司時回空新運正當鱗集本司惴惴惟候漕是懼遂駐舟福興親督濬撈該廳奔走督築清口

越壩相與四顧咨嗟無措士紳有言工房吏書隱夫之弊者查行間該淮徐道清查編補移會到司准此節據生員張四聰火頭孟志等牙行胡邦安等各以山陽縣工房吏書弊端具告已經行提犯人樊繼芳樊世美陳繼文等到司審供夫數彼此異同奸宄百出事關河道錢糧合應會審行據淮安府關催管河同知趙庭琰前來會同高郵州知州陳嗣虞提審間陳知州聞報交代改委該州管河判官徐賢隨同該廳屢次研審明白具招造冊到司據此除覆覈另招詳報外續據署山陽縣印連通判申稱奉委徵

收折夫銀兩悉遵

院道部司嚴諭痛革宿弊設櫃徵收期以首益河夫次資
兵餉及查各行向來以大作小私收幫貼串同胥役詭弊
多端荷蒙本司清查洞晰底裏不意若輩如鬼如蜮有神
機莫測其隱者頃以東省多事貿易蕭條各行牙役多係
五方無藉之徒或以避亂而歸原籍或以利微而遁他方
有懼其追徵唆令小夫逃走者有恃其奸狡拖延不納而
故違繳帖者種種巧智莫可端倪今且藉以更新誰知安
心逋舊蓋清之於平定之時易而清之於變故之時難也

合無請乞本司俯念地方多事徐徐調停則法度可施財
賦自裕是亦權宜兩便之術也等因到司據此看得公家
夫役盡入私門奸詭占欺幾無法紀誣使避怨避勞終是
缺夫缺餉河道胡由整飭末流何所底止本司蒿目時艱
既已身當強禦安得顧慮因循據各犯供寫各衙門公占
夫三千零七十三名各鄉寬舉人優免夫二千四百三十
二名生員優免夫二千四百五十二名各牌頭各鄉村漏
報未註公占夫三千二十九名各犯隱占夫七百八十八
名其中牙人小船埠頭俱四名合為一名稍自分別其外

有行無帖并有帖未供者尚多遺奸雖鬼域之計無方而詭弊之槩已睹即就河廳同州官會審造冊而盡法窮之非苛也第為治去其太甚智者不能違時竊念牙僧多五方流寓之民聚散不一地方當一時有警之際行市蕭條奸人方有味于逋舊巨猾必不樂于更新誠有如該廳所謂清之于平定之時易清之于變故之時難者譬之琴瑟不調則必起而更張之既更則必從而徐調之天禍諸奸自相告發自吐自供河夫之半沒者既可以補九百之額占免與遺漏者復可以濟一時之窮本司不受旁撓也初

以該廳該縣之告急自當首任其怨今以該廳該縣之申
詳似應詳議其要本司不復過求也此惟就心力之可到
一為清查之一途在本衙門之已清者請以各衙門之寬嚴
為準在各項夫之未盡清者請以院道之號帖為準則大
一各小名之間悉聽司土者相時酌議為經久之謨稟自

上裁耳第職掌所宜預言者行夫本為河工而設今所查富
行鹽布經紀埠頭等夫為各犯詭隱者宜盡歸之河工不
應復以貧乏抵數妖賊震隣以地方之夫銀供地方之兵
餉誠目前第一義候兵撤之日仍還河工總之為地方事

也查出夫數可以佐公家急需亦可以寬窮乏之幫貼府
議每夫減免銀兩極得嘉惠良意而舊設河工九百名每
名九兩七錢二分今以減免少虧應以本司清出之夫數
相償者也等因呈詳

河漕二部院請批准安府清審編補著為定例徑詳請奪
外并將有罪犯人樊繼芳樊世美陳繼文張一鳴李逢春
朱有光俱照原擬徒五年姚廷輔徒三年左應春晉爵
李世成李應節劉貴俱不應杖罪各分別追贓未到工房
吏書王士爵鍾惟顯楊恒立愛孫潘加俸陳所成李日苞

郭衛邦鄭尚仁陳永寧顧禮張士進胡應科劉琰高尚志
董盛時習大成張世太徐學禮薛明卿孫應奎吳應龍尹
尚元楊應禎屠惟哲顏奎各占夫數不等俱另行提結并
郭衛邦洗補手本晉爵劉貴等各執照李友換木勾手韓
偉合同晉爵原買僧人雪懷脚夫行帖合同及姚廷輔吏
劄俱塗抹附卷等因具招呈詳

河漕二部院去後續蒙

漕撫軍門部院李詳批樊繼芳等盤結作奸侵占夫銀
以千萬計今得減追倖矣各徒何辭依擬與晉爵等分別

贖完革役發落餘如照取實收繳王士爵等另結又蒙

總理河道軍門部院陳詳批樊繼芳等以積書串吏姚

廷輔等通同作弊表裏為奸詭冒優免之名影射牙行侵
占夫役錢糧需索常例種種不法殊可駭異既經該司審
明依擬樊繼芳等七名贖徒晉爵等四名贖杖劉貴的決
俱革役發落郭衛邦等手本執照合同腳夫行帖并姚廷
輔吏劄追塗附卷未到犯人王士爵等另行提結其各犯
贖銀三千三百餘兩原係減免量追但恐各奸延捱難完
反致遲緩姑卅酌減三分之一應追銀數勒限追完還官

聽河道等項支用餘如照通取實收仍候

總漕部院詳行繳蒙此除案行淮安府管河廳及高郵山陽二州縣查追贖贖聽候河道等項支用及將有罪未到人犯嚴提另結外所有通查行夫的數屢催未據前來及查山陽縣額設河工長夫九百名每名歲給工食銀九兩七錢二分每歲共計該銀八千七百四十八兩出自驛淮牙行徵銀募夫夫募之云者原出隨時僱募者也乃有積年奸棍通同工房積竄謀充老人火頭每五十名為一單設有老人一名為單頭召集四方流棍充數遂常川每名

日給工食二分七釐每逢給散盡是火頭總領散夫食不
克腹通無實惠本司往來堤上查看未見募夫築有堤工
及調撥濟淺往往假做土堆旋點旋散盡屬虛應以致河
淺糧運為梗近議從春季革去計工給銀如板閘一帶撈
濟提河廳呈稱計土論方每日該銀不過一分上下則平
時侵蝕為數不貲小夫既無實沾工程又無實効名存募
夫六百實十無一二並無花名年貌可考不過積棍借以
辰分耳夫以民間千萬金錢徵之何其難而奸棍乾沒費
之何其易况夫既曰募自與徭役不同銀可額支又與徭

夫無異而摧其聚散律以工程大相懸絕本司目擊此弊
病國病河思逐工核實則曰吾常川在工者也及取花名
年貌則曰吾已墊銀短僱者也河官纔一清理便欲蜚語
抗凌法紀蕩然將何抵極除春季工食銀一千五百八十
一兩有零已經會驗發縣貯庫司道議定量給四百兩今
正計濬新河已經會行該府河官督同該縣將前項募夫
從長計議或行縣從舊老人精選壯丁二三百名常川領
銀供役或行縣審用殷實夫頭隨時僱募計工給銀以課
實用再查九百名額内存餘夫銀貯于何處當此

國家多事帑藏空虛前項餘銀或作每年歲工之用或作河上不時之需務須司道逐季會驗明白封識不許移借俾河有實工夫有實用上不病國下不病夫其積奸盤踞蠹河剝衆者嚴懲一二以警其餘目下濬河正急用夫正殷所當明嚴行各官作速議妥著為定例以裨實用等因先經會呈

河漕二部院并案行淮安府及山清管河官火速查明造冊呈報去後續據帶管山清河務連通判開報清理過緊淮大小牙行共夫一萬四千七百七十一名內除減免外

每年實徵銀一萬七千八十七兩三錢二分九釐九毫數
目到司據此為照前項行夫已被山陽工房巧構乾沒今
自清吐十之七八以足河工之舊額而釐積蠹之奸欺上
益漕河下恤民瘼歷觀巡按御史王 南京戶科給事中
歐陽 之疏及 戶部之

題覆

總河部院之明問皆懸懸然及此其為

國計民生意何切也至于減免夫銀一節原為寬恤窮牙不
為富行而獨今閱冊內鹽牙經紀十六名鹽船埠頭九名

又布行棉花經紀與擡鹽腳夫一槩議減不但不服窮牙
之心而將來見之奏章似亦不便牌行連通判即查前項
夫數銀數是否的確鹽行經紀等行何以槩免此外又匿
未吐如工房吏書鍾惟顯丘愛孫等隱占凡載在各犯供
冊者尚多并事在地方者聽道府通查酌議外其河工九
百名每名九兩七錢二分專委糧廳徵收逐計解赴司道
封識自是額規永難虧缺即借作兵餉者終是河工之需
亦當註河道銀兩之籍以備 臺省計本部之清核該廳
始終其事勞勩著聞務為鑒、經久之謨以杜漸、暗消

之計等因備行去後今據本官冊報仍照前開總計牙夫
一萬四千七百七十有奇歲徵一萬七千八十七兩三錢
二分零數目前來於前件內稱查得原文詳過實徵銀一
萬八千零三兩四分後據清江浦浦代頭合食腳頭斛夫
官斛及辛店北鄉雜糧斗手六行因人多利寡不能應夫
告蒙詳准每名於額徵夫銀七兩七錢二分之一內減去七
錢二分實徵銀七兩整共減去銀一千二百四十八兩止
實存銀一萬六千七百五十五兩零四分今以見在實徵
銀一萬七千零八十七兩三錢二分九釐九毫爲率較比

減定之數外尚餘剩銀三百三十二兩二錢八分九釐零
以備牙役之中有事故告繳失額之數其續有詳准優免
人數俱在額供河夫九百名之外開銷其額徵夫銀之內
續准本府詳允開發優免公占每歲免銀九百二十七兩
三錢五分一釐另文呈報等因據此看得行夫之設其來
既久歲徵之額為數頗多乃奸人覓法盡歸私橐以故由
九百而減至五百即五百亦無徵而五季無餉山陽河道
外決內淤司道臨河蒿目坐困向非多方集夫親督撈浚
將東南四百萬之軍糈咽喉梗塞悞國悞河誰為厲階

一本司忝屬河員敢溺河職故不避勞怨查此河夫要見清銀原得二萬二千有奇內除減免者五千餘金尚存一萬七千零昔何以廳縣申詳苦無分文今何以萬千現徵還有未盡此隱占之定案難容奸謀翻倒若夫乾沒之餘查有前數九百名額夫之外贏餘實多該府借以佐兵兵與河皆為

王事本司亦不過藉手揀敝斷不敢貪天為功惟是目前清查載在冊籍者固難更張而歷年侵蝕夫銀奉詳追贓之罪犯延及一年未完十分之一捏詞推調意圖翻倒又招

內另提同侵夫數之工房與明盜廠木假寫硃票之工書
仍在該房應役未經究問均可駭異所當請明定立期限
嚴行追提照數還官以清積案者也司道清夫殫厥心力
始得清銀二萬二千零者要亦十之七八其未清者尚多
也既而寬恤貧牙減去五千餘金實存一萬七千八十餘
兩減之為數不貲矣近該廳報又有優免九百餘兩之數
及面稟重名繳帖退減徵銀之說雖云不損正額已與原
文不侔皆由帖無憑清數得以影射詭隱以致牙行逐日
新增夫銀侵尋減竊恐日甚一日年復一年將來借編

補之名為消磨之計不數年又踵五百無徵五季無餉之
轍矣是更可惜矣今議以一萬七千八十七兩為準期于
永毋虧缺凡牙行見充及新增納銀者俱請司道號票為
照告退者銷票准退無票不許私克私克者告發治罪牙
行消長與收過夫銀按季填報司道具數轉呈

本部院查考以絕每年編審工房百出之弊河夫額銀照
舊解驗仍以銀之盈縮課徵收委官之殿最總于年終會
呈獎戒所當請明嚴行申飭以垂久計者也再照前項夫
銀開徵始于去歲秋季則三月清查之後尚有一季未徵

大約四千餘兩未據聲說不知諸犯復將此銀置於何地
其各犯之供報未吐者及鹽埠布行之舊額當仍者俱應
亟為清查以完前件至于論工募夫計土給價并他日撤
兵歸河之餉均非細務相應及時酌量以求益漕河永祛
奸蠹著為一定不移之規共作地方維新之政所當請明
會行該府該廳仰遵

憲令協衷綜核以無負同舟之誼者也伏乞
照詳施行

本院批據議行夫宿蠹洞下觀火欲祛虧額私克之弊法

無善于司道號票見克新增者給告退者銷其牙行銷長
收過夫銀按季填報委官以徵銀多寡為殿最年終獎戒
悉如詳行至于前此一季未徵之銀及論工募夫計土給
價并撤兵歸河之餉與夫奉追未完之贖銀照提未結之
工吏工書仰司仍會同該道查議併結繳

條議河漕事宜詳文

為敬陳河漕管見職掌寸丹以備採擇以明愚悃事職以
淺昧之才謬叨南河之任復以漕運之厄正當河患之殷
日凜凜以溺職為懼殫精三載之餘置身怨勞之數荷蒙

兩總院留任築濬諸役幸已拮据告成雖竭犬馬之愚尚
有芻蕘之見可以仰報任使萬一者敢不一一陳之竊念
黃河萬里奔流至清口會淮以入於海不但上為

祖陵之合襟下關淮揚之命脉而四百萬漕糧藉為咽喉黃
強淮弱向來已然近歲上決下淤奪淮內灌河身日高運
渠日墊清口黃沙橫積將有萬曆初年水回肝泗之漸其
作溜阻漕見為運梗

新任總河部院近有治水一疏已灼見本原與

漕撫部院呂 極論治漕諸款合之已無遺慮而職請申言其

說所以避河之害全漕之利者竊謂必治河而後可以治漕尤必治漕而後可以治河也夫河之好決自周漢已然先任總河部院潘 歷試諸艱築堤塞決束水歸漕借淮刷黃以水治水故河漕不相為厄而交相為用今歲運之過淮幸新舊河大挑無阻而磨兒庄上下輒阻溜一十二處者何也伏秋水漲水居其二沙居其八有水緩沙停之處即有溜急衝深之處也昔嘗深通無阻而今顧沉城梗運者何也有上流之決口散漫又有下流之分水漏胎也蓋上愈決則下愈壅下一分則上必緩決而壅分而緩則

沙停而河飽為今之計必上流諸決口盡塞遙堤盡固而後迅流直刷乎河底又必循舊六月之初即築清口大壩各閘啟一閉二而後借淮携黃以歸海如是而漕必無淺溜阻也是治河正所以治漕也然回空至秋仲未盡漕何以速重船至秋後方盡清口何以壩必如

漕撫部院所陳申飭與戶部倉場近疏確遵

功令務正運期在初夏以前過盡其鮮

貢諸船亦照先年仲夏以前過閘清口可仍大壩淮必併而北黃必勇而東溜淺俱刷海口俱闢是治漕正所以治

河也不然黃河去年之溜今年必倍運河今年雖濬異日旋淤行將無河安望有運乎

台臺心切禹思忠存國計職故不禁狂言之無當也至於河道錢糧徵收出納皆由府縣稽查數目則由司道自歲修決工冒破多端而侵漁影占弊竇百出惟減估一分則存一分於公家多清一分則還一分於實用故職自蒞任以來節省減估共以萬計清追亦以六千餘計俱有案卷冊籍可查然節者節公帑之不足非節其有餘者也清者清侵蝕於已無非清其見有者也苟有利於

國家誠無顧於怨毒矣而清查淮安行夫之銀為最艱

先總河潘以濱河牙行定夫九百名供役副使袁應泰
郎中李之藻更為徵銀八千七百四十八兩以募夫至職
蒞任五季無夫無餉廢濬廢築故天啟二年二月內與副
使宋統殷任怨清查會議寬嚴之中詳委府佐歲徵銀一
萬七千八十七兩三錢二分九釐九毫俱該府貯庫司其
筭鑰為每歲募夫河工之用淮郡凋瘵最貧如派充寢官
帑如洗河患日深中河青田之役因河南協濟銀二萬兩
未得如議奉

前任總河部院房憲牌取揚州府由關等銀一萬兩江
都縣贖銀一千二百七十兩零寶應縣河道銀一千八百
三十二兩零共一萬三千餘兩以應之第行夫九百名額
銀八千七百四十八兩此係募夫正項不可移動其在額
外者因鄒滕有警清口募兵五百餘名防守該府議借為
餉比即呈俟兵銷之後仍歸正項今存兵一百七十餘名
尚支銀二千餘兩一切實在支銷該府有冊纖毫不由司
道而商賈盛衰店行消長繳帖領帖日異月殊故寧存之
地方聽有司酌量新舊抵補莫不失額以待河道不時之

需亦未敢指為定額 奏聞貽地方以不堪然自天啟二
年秋季七月府佐徵銀歷季拖欠遂至六千餘兩奉

漕撫部院呂 憲牌嚴催職與宋叅政勒限親比始漸報
有收納一番稽覈一番任怨無論盡洗衙門之陋覲抑亦
且置禍機於度外殊非見成易得之物前科臣歐陽
解 兩見之疏中職亦登之 奏繳并具冊於

本部堂矣乃

戶部餉院節次行文到司欲借以抵桃鹽加派責職以濡
滯蒙

總院檄下司道司道檄下該府該府初以一千四百兩議
抵既以水衡錢不敢議覆復聞槩淮加派先年止撫州縣
回冊多少互錯今自可覈以相抵見蒙

漕撫部院呂 行府清查職以為田糧自田河銀自河

工部之屬司宜清工部之工用似宜據職掌一明之又思
在彼在此總歸公家或多或少或少皆裨

國計何必遲遲以自抹其苦心第奉

總河部院朱 疏明那移抵借之禁新奉

功令且河患方殷經費無極是宜具文請詳不宜輒自專擅

故先嚴徵比逋銀據同知張元弼開櫃徵收報有陸續納銀五千七百三十九兩零見貯府庫職敢任怨不敢任濡滯之罪與擅專之罪也淮工已完具文請代所有任內事宜除節省減估以萬餘計不必言也所有清追銀兩共計六千二百九十七兩九錢五分零其正項開銷并見追見貯悉留之以為河道之儲另具揭帖開報要之涓滴無加於河海纖毫必殫其血誠而已伏乞 俯察愚誠倘所言河漕有當者或 採之施行以濟時艱至於行夫銀兩并鑒徵比者府廳收貯者府正出入皆有司存職惟竭蹶稽

除正額外餘銀應否抵補鹽挑加派多寡應否俟府查
糧清補夫銀仍歸河道特 賜主持回咨

戶部及移文餉院以免職執法清查者之罪庶犬馬得終
其微勞而芻蕘少裨於

國用矣為此具呈伏乞

照詳施行

按河漕利害載在河防諸書甚明非臆創說至於淤河為
避黃利漕之捷徑其功匪小邇年宿遷以上多溜阻船皆
由淤壅水激而然訪有董陳二溝跋馬湖接加僅六十里

中有二十里尚無緯堤及今湖身淺涸因鑿為深因土為岸所費無幾而漕免紆迴百里之害真稱永利見邳宿同知宋士中鑿鑿言之盛故陳之

河漕兩臺以成其是近補儲道亟備一議